

# আবোল তাবোল

সুকুমার রায়

বইয়ের দোকান

[www.boierdokan.com](http://www.boierdokan.com)

## কৈফিয়ত

যাহা আজগুবি, যাহা উদ্ভট, যাহা অসম্ভব, তাহাদের লইয়াই এই পুস্তকের কারবার। ইহা খেয়াল রসের বই। সুতরাং সে রস যাঁহারা উপভোগ করিতে পারেন না, এ পুস্তক তাহাদের জন্য নহে। পুস্তকের অধিকাংশ ছবি ও কবিতা নানা সময়ে "সন্দেশ" পত্রিকা হইতে সংগৃহীত হইয়াছে। এক্ষণ আবশ্যিক মত সংশোধন ও পরিবর্তন করিয়া এবং নানা স্থলে নূতন মালমশলা যোগ করিয়া সেগুলি পুস্তকাকারে প্রকাশ করা হইল।

## সূচী

- আবোল তাবোল-১
- খিচুড়ি
- কাঠ-বুড়ো
- গৌফ চুরি
- শব্দ কল্প দ্রুম!
- সৎ পাত্র
- কাতুকুতু বুড়ো
- বাবুরাম সাপুড়ে
- প্যাঁচা আর প্যাঁচানি
- ভালরে ভাল
- খুড়োর কল
- লড়াই-ক্ষ্যাপা
- ছায়াবাজি
- কুম্ড়োপটাশ
- সাবধান
- হাতুড়ে
- চোর ধরা
- অবাক কাণ্ড
- কিস্তুত!
- ন্যাড়া বেলতলায় যায় ক'বার?
- বুঝিয়ে বলা
- বুড়ীর বাড়ি
- বোম্বাগড়ের রাজা
- ঠিকানা
- একুশে আইন
- বিজ্ঞান শিক্ষা
- হুকুমুখে হ্যাংলা
- দাঁড়ে দাঁড়ে দ্রুম!
- রামগরুড়ের ছানা
- ডানপিটে
- নারদ! নারদ!
- ট্যাশ গরু
- ফস্কে গেল
- কি মুস্কিল!
- ভূতুড়ে খেলা
- আফ্রাদী
- কাঁপুনে
- হলের গান
- হাত গণনা
- গন্ধ বিচার
- গল্প বলা
- নোট বই
- ভয় পেয়ো না
- পালোয়ান

- আবোল তাবোল-২

### আবোল তাবোল-১

আয়রে ভোলা খেয়াল-খোলা  
স্বপনদোলা নাচিয়ে আয়,  
আয়রে পাগল আবোল তাবোল

মত্ত মাদল বাজিয়ে আয়।  
আয় যেখানে ক্ষ্যাপার গানে  
নাইকো মানে নাইকো সুর।  
আয়রে যেথায় উধাও হাওয়ায়  
মন ভেসে যায় কোন সুদূর।  
আয় ক্ষ্যাপা-মন ঘুচিয়ে বাঁধন  
জাগিয়ে নাচন তাধিন্ ধিন্,  
আয় বেয়াড়া সৃষ্টিছাড়া  
নিয়মহারা হিসাবহীন।  
আজগুবি চাল বেঠিক বেতাল  
মাতবি মাতাল রপ্তে--  
আয়রে তবে ভুলের ভবে  
অসম্ভবের ছন্দেতে।।

## খিচুড়ি

হাঁস ছিল, সজারু, (ব্যাকরণ মানি না),  
হয়ে গেলে "হাঁসজারু" কেমনে তা জানি না।  
বক কহে কচ্ছপে "বাহবা কি ফুর্তি!  
অতি খাসা আমাদের বকচ্ছপ মূর্তি।"

টিয়ামুখো গিরগিটি মনে ভারি শঙ্কা  
পোকা ছেড়ে শেষে কিগো খাবে কাঁচা লক্ষা?  
ছাগলের পেটে ছিল না জানি কি ফন্দি,  
চাপিল বিছার ঘাড়ে, ধড়ে মুড়ো সন্ধি!  
জিরাফের সাধ নাই মাঠে ঘাটে ঘুরিতে,  
ফড়িঙের ঢং ধরি, সেও চায় উড়িতে।  
গরু বলে, "আমারেও ধরিলো কি ও রোগে?  
মোর পিছে লাগে কেন হতভাগা মোরগে?"  
হাতিমির দশা দেখ , তিমি ভাবে জলে যাই,  
হাতি বলে, "এই বেলা জঙ্গলে চল ভাই"।  
সিংহের শিং নেই, এই তার কষ্ট  
হরিণের সাথে মিলে শিং হল পষ্ট।

### কাঠ-বুড়ো

হাঁড়ি নিয়ে দাড়িমুখো কে যেন কে বৃদ্ধ,  
রোদে বসে চেটে খায় ভিজে কাঠ সিদ্ধ।  
মাথা নেড়ে গান করে গুন গুন সংগীত  
ভাব দেখে মনে হয় না জানি কি পন্ডিত!

বিড়ু বিড়ু কি যে বকে নাহি তার অর্থ-  
"আকাশেতে বুল ঝোলে, কাঠে তাই গর্ত।"

টেকো মাথা তেতে ওঠে গায়ে ছোট ঘর্ম  
রেগে বলে, "কেবা বোঝে এ সবে মর্ম?"

আরে মোলো, গাধাগুলো একেবারে অন্ধ,  
বোঝেনাকো কোন কিছু খালি করে দ্বন্দ্ব।  
কোন কাঠে কত রস জানে নাকো তত্ত্ব  
একাদশী রাতে কেন কাঠে হয় গর্ত?"

আশে পাশে হিজি বিজি আঁকে কত অঙ্ক  
ফাটা কাঠ ফুটো কাঠ হিসাব অসংখ্য;  
কোন ফুটো খেতে ভাল, কোনটা বা মন্দ,  
কোন কোন ফাটলের কি রকম গন্ধ।

কাঠে কাঠে ঠুকে করে ঠকাঠক শব্দ,  
বলে, "জানি কোন কাঠ কিসে হয় জব্দ।  
কাঠকুটো যেঁটেঘুঁটে জানি আমি পষ্ট,  
এ কাঠের বজ্জাতি কিসে হয় নষ্ট।

কোন কাঠ পোষ মানে, কোন কাঠ শান্ত,  
কোন কাঠ টিস্টিমে, কোনটা বা জ্যান্ত।  
কোন কাঠে জ্ঞান নাই মিথ্যা কি সত্য,  
আমি জানি কোন কাঠে কেন থাকে গর্ত।"

## গোঁফচুরি

হেড্ আফিসের বড় বাবু লোকটি বড় শান্ত,  
তার যে এমন মাথায় ব্যামো কেউ কখনো জানত?  
দিব্য ছিলেন খোসমেজাজে চেয়ারখানি চেপে,  
একলা ব'সে ঝিমঝিমিয়ে হঠাৎ গেলেন ক্ষেপে!  
আৎকে উঠে হাতে পা ছুঁড়ে চোখটি ক'রে গোল  
হঠাৎ বলেন, "গেলুম গেলুম, আমায় ধ'রে তোল"!  
তাই শুনে কেউ বদ্যি ডাকে, কেউ বা হাঁকে পুলিশ,  
কেউবা বলে, "কামড়ে দেবে সাবধানেতে তুলিস।  
ব্যস্ত সবাই এদিক ওদিক করছে যোরাঘুরি

বাবু হাঁকেন, "ওরে আমার গৌফ গিয়েছে চুরি"!  
গৌফ হারান! আজব কথা! তাও কি হয় সত্যি?  
গোফ জোড়া ত তেমনি আছে, কমেনি এক রত্তি!  
সবাই তাঁরে বুঝিয়ে বলে, সামনে ধ'রে আয়না,  
মোটোও গৌফ হয়নি চুরি, কক্ষনো তা হয় না।

রেগে আগুন তেলে বেগুন, তেড়ে বলেন তিনি,  
"কারো কথার ধার ধারিনে, সব ব্যাটাকেই চিনি।  
নোংরা ছাঁটা খ্যাংরা ঝাঁটা বিচ্ছিরি আর ময়লা,  
এমন গোফ ত রাখত জানি শ্যামবাবুদের গয়লা।  
এ গৌফ যদি আমার বলিস করব তোদের জবাই"  
এই না ব'লে জরিমানা কল্লেন তিনি সবায়।  
ভীষণ রেগে বিষম খেয়ে দিলেন লিখে খাতায়  
"কাউকে বেশি লাই দিতে নেই, সবাই চড়ে মাথায়।  
আফিসের এই বাঁদরগুলো, মাথায় খালি গোবর  
গৌফ জোড়া যে কোথায় গেলে কেউ রাখে না খবর।  
ইচ্ছে করে এই ব্যাটাদের গৌফ ধরে খুব নাচি,  
মুখ্যগুলোর মুন্ড ধ'রে কোদাল দিয়ে চাঁচি।  
গৌফকে বলে তোমার আমার গৌফ কি কারো কেনা?  
গৌফের আমি গৌফের তুমি, তাই দিয়ে যায় চেনা।"

### শব্দকল্পদ্রুম

ঠাস্ ঠাস্ দ্রুম দ্রাম, শুনে লাগে খটকা--  
ফুল ফোটে? তাই বল! আমি ভাবি পটকা!  
শাঁই শাঁই পন্ পন্ ভয়ে কান বন্ধ--  
ওই বুঝি ছুটে যায় সে-ফুলের গন্ধ?  
ছড়মুড় ধুপধাপ--ওকি শুনি ভাইরে!  
দেখছনা হিম পড়ে-- যেও নাকো বাইরে।  
চুপ চুপ ঐ শোন! ঝুপ ঝাপ্ ব-পাস!  
চাঁদ বুঝি ডুবে গেল? গব্ গব্ গ-বাস!  
খ্যাশ্ খ্যাশ্ ঘ্যাচ্ ঘ্যাচ্ রাত কাটে ওই রে!  
তুড়দাড় চুরমার--ঘুম ভাঙ্গে কই রে!  
ঘর্ ঘর্ ভন্ ভন্ ঘোরে কত চিন্তা!  
কত মন নাচ শোন--খেই খেই খিন্তা!  
ঠুং ঠাং ঢং ঢং, কত ব্যথা বাজেরে--  
ফট্ ফট্ বুক ফাটে তাই মাঝে মাঝে রে!



হৈ হৈ মার মার বাপ বাপ চিৎকার--  
মালকোঁচা মারে বুঝি? সরে পড় এইবার।

### সং পাত্র

শুনতে পেলুম পোস্তা গিয়ে-  
তোমার নাকি মেয়ের বিয়ে?  
গঙ্গারামকে পাত্র পেলো?  
জানতে চাও সে কেমন ছেলে?  
মন্দ নয়, সে পাত্র ভাল-  
রঙ যদিও বেজায় কালো;  
তার উপরে মুখের গঠন  
অনেকটা ঠিক প্যাঁচার মতন।  
বিদ্যে বুদ্ধি? বলছি মশাই-  
ধন্য ছেলের অধ্যবসায়!  
উনিশটি বার ম্যাট্রিকে সে  
ঘায়েল হ'য়ে থামল শেষে।  
বিষয় আশয় ? গরীব বেজায়-  
কষ্টে- সৃষ্টে দিন চলে যায়।

মানুষ ত নয় ভাইগুলো তার  
একটা পাগল একটা গোঁয়ার ;  
আরেকটি সে তৈরি ছেলে,  
জাল করে নোট গেছেন জেলে।  
কনিষ্ঠটি তবলা বাজায়  
যাত্রাদলে পাঁচ টাকা পায়।  
গঙ্গারাম ত কেবল ভোগে  
পিলের জ্বর আর পান্ডু রোগে।  
কিন্তু তারা উচ্চ ঘর,  
কংসরাজের বংশধর!  
শ্যাম লাহিড়ী বনগ্রামের  
কি যেন হয়ে গঙ্গারামের।-  
যাহোক, এবার পাত্র পেলে,  
এমন কি আর মন্দ ছেলে?

### কাতুকুতু বুড়ো

আর যেখানে যাও না রে ভাই সগুসাগর পার,  
কাতুকুতু বুড়োর কাছে যেও না খবরদার!  
সর্বনেশে বৃদ্ধ সে ভাই যেও না তার বাড়ি-  
কাতুকুতুর কুল্পি খেয়ে ছিঁড়বে পেটের নাড়ি।  
কোথায় বাড়ি কেউ জানে না, কোন সড়কের মোড়ে,  
একলা পেলে জোর করে ভাই গল্প শোনায় পড়ে।  
বিদম্বুটে তার গল্পগুলো না জানি কোন্ দেশী,  
শুনলে পরে হাসির চেয়ে কান্না আসে বেশী।  
না আছে তার মুন্ডু মাথা, না আছে তার মানে,  
তবুও তোমায় হাসতে হবে তাকিয়ে বুড়োর পানে।  
কেবল যদি গল্প বলে তাও থাকে যায় সয়ে,  
গায়ের উপর সুড়সুড়ি দেয় লম্বা পালক লয়ে।  
কেবল বলে, "হোঃ হোঃ হোঃ, কেষ্টদাসের পিসি-  
বেচ্ছত খালি কুমড়ো কচু হাঁসের ডিম আর তিসি।  
ডিমগুলো সব লম্বা মতন, কুমড়োগুলো বাঁকা,  
কচুর গায়ে রঙ-বেরঙের আলপনা সব আঁকা।  
অষ্ট প্রহর গাইত পিসি আওয়াজ ক'রে মিহি,  
ম্যাও ম্যাও ম্যাও বাকুম বাকুম ভৌ ভৌ ভৌ চীহি।"

এই না বলে কুটুং করে চিমটি কাটে ঘাড়ে,  
খ্যাংরা মতন আঙুল দিয়ে খোঁচায় পাঁজর হাড়ে।  
তোমায় দিয়ে সুড়সুড়ি সে আপনি লুটোপুটি,  
যতক্ষণ না হাসবে তোমার কিচ্ছুতে নাই ছুটি।

### বাবুরাম সাপুড়ে

বাবুরাম সাপুড়ে,  
কোথা যাস্ বাপুৱে?  
আয় বাবা দেখে যা,  
দুটো সাপ রেখে যা!  
যে সাপের চোখ নেই,  
শিং নেই নোখ নেই,  
ছোটে নাকি হাঁটে না,  
কাউকে যে কাটে না,  
করে নাকো ফোঁস ফাঁস,  
মারে নাকো টুঁশ্ টাঁশ্,  
নেই কোন উৎপাত,  
খায় শুধু দুধভাত--  
সেই সাপ জ্যান্ত  
গোটা দুই আনত?  
তেড়ে মেরে ডাঙা  
ক'রে দেই ঠাঙা।

## পঁ্যাচা আর পঁ্যাচানি

পঁ্যাচা কয় পঁ্যাচানি,  
খাসা তোর চঁ্যাচানি!  
শুনে শুনে আনমন  
নাচে মোর প্রাণমন!  
মাজা-গলা চাঁচা সুর  
আহাদে ভরপুর!  
গলা-চেরা গমকে  
গাছ পালা চমকে,  
সুরে সুরে কত পঁ্যাচ  
গিটিকরি কঁ্যাচ কঁ্যাচ!  
যত ভয় যত দুখ  
দুর দুর ধুক্ ধুক্,  
তোর গানে পেঁচি রে  
সব ভুলে গেছি রে-  
চাঁদ মুখে মিঠে গান  
শুনে ঝরে দু'নয়ান।

## ভালরে ভাল

দাদা গো! দেখিছ ভেবে অনেক দূর  
এই দুনিয়ার সকল ভাল,  
আসল ভাল নকল ভাল,  
সস্তা ভাল দামীও ভাল,  
তুমিও ভাল আমিও ভাল,  
হেথায় গানের ছন্দ ভাল,  
হেথায় ফুলের গন্ধ ভাল,  
মেঘ-মাখানো আকাশ ভাল,  
ঢেউ- জাগানো বাতাস ভাল,  
গ্রীষ্ম ভাল বর্ষা ভাল,  
ময়লা ভাল ফরসা ভাল,  
পোলাও ভাল কোর্মা ভাল,  
মাছপটোলের দোলমা ভাল,  
কাঁচাও ভাল পাকাও ভাল,  
সোজাও ভাল বাঁকাও ভাল,  
কাঁসিও ভাল ঢাকও ভাল,  
টিকিও ভাল টাকও ভাল,  
ঠেলার গাড়ী ঠেলতে ভাল,  
খাস্তা নুঁচি বেলতে ভাল,  
গিটিকরি গান শুনতে ভাল,  
শিমুল তুলো ধুনতে ভাল,  
ঠান্ডা জলে নাইতে ভাল।

কিন্তু সবার চাইতে ভাল-  
পাঁউরুটি আর ঝোলা গুড়।

### খুড়োর কল

কল করেছেন আজব রকম চন্ডীদাসের খুড়ো-  
সবাই শুনে সাবাস্ বলে পাড়ার ছেলে বুড়ো।  
খুড়োর যখন অল্প বয়স- বছর খানকে হবে-  
উঠেলা কেঁদে "গুংগা" ব'লে ভীষণ অট্টরবে।  
আর তো সবাই "মামা" "গাগা" আবোল তাবোল বকে,  
খুড়োর মুখে "গুংগা" শুনে চমকে গেল লোকে।  
বল্লে সবাই, "এই ছেলেটা বাঁচলে পরে তবে,  
বুদ্ধি জেরে এ সংসারে একটা কিছু হবে।"  
সেই খুড়ো আজ কল করেছেন আপন বুদ্ধি বলে,  
পাঁচ ঘন্টার রাস্তা যাবে দেড় ঘন্টায় চলে।  
দেখে এলাম কলটি অতি সহজ এবং সোজা,  
ঘন্টা পাঁচেক ঘাঁটলে পরে আপনি যাবে বোঝা।  
বলব কি আর কলের ফিকির, বলতে না পাই ভাষা,  
ঘাড়ের সঙ্গে যন্ত্র জুড়ে এক্কেবারে খাসা।

সামনে তাহার খাদ্য ঝোলে যার যে রকম রুচি-  
মন্ডা মিঠাই চপ্ কাট লেটখাজা কিংবা লুচি।  
মন বলে তায় "খাব খাব" মুখ চলে যায় তায় খেতে,  
মুখের সঙ্গে খাবার ছোটে পাল্লা দিয়ে মেতে।  
এমনি করে লোভের টানে খাবার পানে চেয়ে,  
উৎসাহেতে হুঁস্ রবে না চলবে কেবল ধেয়ে।  
হেসে খেলে দু'দশ যোজন চলবে বিনা ক্লেশে,  
খাবার গন্ধে পাগল হ'য়ে জিভের জলে ভেসে।  
সবাই বলে সমস্বরে ছেলে জোয়ান বুড়ো,  
অতুল কীর্তি রাখল ভবে চন্ডীদাসের খুড়ো।

## লড়াই ক্ষ্যাপা

ওই আমাদের পাগলা জগাই, নিত্যি হেথায় আসে;  
আপন মনে গুন্ গুনিযে মুচুকি হাসি হাসে ।  
চলতে গিয়ে হঠাৎ যেন ধমক লেগে থামে;  
তড়াক করে লাফ দিয়ে যায় ডাইনে থেকে বামে।  
ভীষন রোখে হাত গুটিয়ে সামলে নিয়ে কোচা ;  
"এইযো" বলে ক্ষ্যাপার মতো গুনে মারে খোচা ।  
চৌচিয়ে বলে , "ফাদঁ পেতেছ ? জগাই কি তায় পড়ে?  
সাত জার্মান, জগাই একা, তরুও জগাই লড়ে।"  
উৎসাহেতে গরম হয়ে তিড়িং বিড়িং নাচে,  
কখনও যায় সামনে তেড়ে, কখনও যায় পাছে।  
এলোপাতাড়ি ছাতার বাড়ি ধুপুস ধাপুস কত!  
চক্ষু বুজে কায়দা খেলায় চর্কিবাজির মত।  
লাফের চোটে হাঁপিয়ে ওঠে গায়েতে ঘাম ঝরে,  
দুডুম ক'রে মাটির পরে লম্বা হয়ে পড়ে।  
হাত পা ছুঁড়ে চেঁচায় খালি চোখটি ক'রে ঘোলা,  
"জগাই মেলো হঠাৎ খেয়ে কামানের এক গোলা"!  
এই না বলে মিনিট খানেক ছটফটিয়ে খুব,  
মড়ার মত শক্ত হ'য়ে এক্কেবারে চূপ !  
তার পরেতে সটান বসে চুলকে খানিক মাথা,  
পকেট থেকে বার করে তার হিসেব লেখার খাতা।  
লিখলে তাতে- "শোনরে জগাই, ভীষন লড়াই হলো  
পাচ ব্যাটাকে খতম করে জগাই দাদা মোলো।"

## ছায়াবাজি

আজগুবি নয়, আজগুবি নয়, সত্যিকারের কথা-  
ছায়ার সাথে কুস্তি করে গাত্রে হল ব্যাথা।  
ছায়া ধরার ব্যবসা করি, তাও জাননা বুঝি?  
রোদের ছায়া, চাঁদের ছায়া, হরেক রকম পুঁজি!  
শিশির ভেজা সদ্য ছায়া, সকাল বেলায় তাজা,  
গ্রীষ্মকালে শুকনো ছায়া ভীষণ রোদে ভাজা।  
চিলগুলো যায় দুপুরে বেলায় আকাশ পথে ঘরে  
ফাঁদ ফেলে তার ছায়ার উপর খাঁচায় রাখি পুরে।  
কাগের ছায়া বগের ছায়া দেখছি কত ঘেঁটে-  
হাক্কা মেঘের পানসে ছায়া তাও দেখিছ চেটে।  
কেউ জানে না এ সব কথা কেউ বোঝে না কিছু,  
কেউ ঘোরে না আমার মত ছায়ার পিছু পিছু।  
তোমরা ভাব গাছের ছায়া অমনি লুটায় ভূয়ে,  
অমনি শুধু ঘুমায় বুঝি শান্ত মতন শুয়ে;  
আসল ব্যাপার জানবে যদি আমার কথা শোনো,  
বলছি যা তা সত্যি কথা, সন্দেহ নাই কোনো।  
কেউ যবে তার রয় না কাছে, দেখতে নাহি পায়  
গাছের ছায়া ফুটফুটিয়ে এদিক ওদিক চায়।  
সেই সময়ে গুড় গুড়িয়ে পিছন হাতে এসে  
ধামায় চেপে ধপাস করে ধরবে তারে ঠেসে।  
পাংলা ছায়া ফোকলা ছায়া, ছায়া গভীর কালো-  
গাছের চেয়ে গাছের ছায়া সব রকমেই ভালো।  
গাছ গাছালি শেকড় বাকল মিথ্যে সবাই গেলে,  
বাপরে বলে পালায় ব্যামো ছায়ার ওষুধ খেলে।  
নিমের ছায়া ঝিঙের ছায়া তিক্ত ছায়ার পাক,  
যেই খাবে ভাই অঘোর ঘুমে ডাকবে তাহার নাক।  
চাঁদের আলোয় পেঁপের ছায়া ধরতে যদি পার,  
শুঁকালে পরে সর্দিকাশি থাকবে না আর কারো।  
আমড়া গাছের নোংরা ছায়া কামড়ে যদি খায়  
ল্যাংড়া লোকের ঠ্যাং গজবে সন্দেহ নাই তায়।  
আষাঢ় মাসের বাঙ্গলা দিনে বাঁচতে যদি চাও,  
তেঁতুল তলার তগু ছায়া হুঁটা তিনেক খাও।  
মোঁয়া গাছের মিষ্টি ছায়া রুটিং দিয়ে শুষে  
ধুয়ে মুছে সাবানেতে রাখছি ঘরে পুষে!  
পাক্কা নতুন টাটকা ওষুধ একেবারে দিশি-  
দাম করেছি সস্তা বড়, চোন্দ আনা শিশি।



## কুমড়োপটাশ

(যদি) কুমড়োপটাশ নাচে--

খবরদার এসো না কেউ আস্তাবলের কাছে;  
চাইবে নাকো ডাইনে বাঁয়ে চাইবে নাকো পাছে;  
চার পা তুলে থাকবে ঝুলে হট্টমুলার গাছে!

(যদি) কুমড়োপটাশ কাঁদে--

খবরদার! খবরদার! বসবে না কেউ ছাদে;  
উপুড় হয়ে মাচায় শুয়ে লেপ কমল কাঁধে;  
বেহাগ সুরে গাইবে খালি 'রাধে কৃষ্ণ রাধে'!

(যদি) কুমড়োপটাশ হাসে--

থাকবে খাড়া একটি ঠ্যাঙে রান্নাঘরের পাশে;  
ঝাপসা গলায় ফার্সি কবে নিশ্বাসে ফিস্ফাসে;  
তিনটি বেলা উপোস করে থাকবে শুয়ে ঘাসে!

(যদি) কুমড়োপটাশ ছোট্টে--

সবাই যেন তড়বড়িয়ে জানলা বেয়ে ওঠে;  
হুকোর জলে আলতা গুলে লাগায় গালে ঠোঁটে;  
ভুলেও যেন আকাশপানে তাকায় না কেউ মোটে!

(যদি) কুমড়োপটাশ ডাকে--

সবাই যেন শামলা এঁটে গামলা চড়ে থাকে;  
ছেঁচকি শাকের ঘণ্ট বেটে মাথায় মরম মাখে;  
শক্ত হুঁটের তপ্ত ঝামা ঘষতে থাকে নাকে!

তুচ্ছ ভেবে এ-সব কথা করছে যারা হেলা,  
কুমড়োপটাশ জানতে পেলে বুঝবে তখন ঠেলা।  
দেখবে তখন কোন কথাটি কেমন কলে ফলে,  
আমায় তখন দোষ দিও না, আগেই রাখি বলে।

## সাবধান

আরে আরে, ওকি কর প্যালারাম বিশ্বাস?  
ফোঁস ফোঁস অত জোরে ফেলোনাকো নিশ্বাস।  
জানোনা কি সে বছর ওপাড়ার ভূতানাথ,  
নিশ্বাস নিতে গিয়ে হয়েছিল কুপোকাৎ?  
হাঁপ ছাড় হাঁসফাঁস ও রকম হাঁ করে-  
মুখে যদি ঢুকে বসে পোকা মাছি মাকড়ে?  
বিপিনের খুঁড়ো হয় বুড়ো সেই হল' রায়,  
মাছি খেয়ে পাঁচ মাস ভুগেছিল কলেরায়।  
তাই বলি- সাবধান! ক'রোনাকো ধুপ্ধাপ্,  
টিপি টিপি পায় পায় চলে যাও চূপ্ চাপ্।  
চেয়োনাকো আগে পিছে, যেয়োনাকো ডাইনে  
সাবধানে বাঁচে লোকে,- এই লেখে আইনে।  
পড়েছ ত কথা মালা? কে যেন সে কি করে  
পথে যেতে পড়ে গেল পাতকো'র ভিতরে ?  
ভালো কথা- আর যেন সকালে কি দুপুরে ,  
নেয়োনাকো কোনো দিন ঘোষেদের পুকুরে,  
এরকম মোটা দেহে কি যে হবে কোন্ দিন,  
কথাটাকে ভেবে দেখ কি রকম সঙ্গিন!  
চটো কেন? হয় নয় কে বা জানে পষ্ট,  
যদি কিছু হ'য়ে পড়ে পাবে শেষে কষ্ট।  
মিছিমিছি ঘ্যান্ ঘ্যান্ কেন কর তরু?  
শিখেছ জ্যাঠামো খালি, ইঁচরেতে পক্ক ,  
মানবে না কোন কথা চলা ফেরা আহারে ,  
একদিন টের পাবে ঠেলা কয় কাহারে ।  
রমেশের মেঝা মামা সেও ছিল সেয়না,  
যত বলি ভালো কথা কানে কিছু নেয়না  
শেষকালে একদিন চান্নির বাজারে  
প'ড়ে গেল গাড়ি চাপা রাস্তার মাঝারে!

## হাতুড়ে

একবার দেখে যাও ডাক্তারি কেরামৎ-  
কাটা ছেঁড়া ভাঙা চেরা চটপট মেরামৎ  
কয়েছেন গুরু মোর, "শোন শোন বৎস,  
কাগজের রোগী কেটে আগে কর মস্ত্র"  
উৎসাহে কি না হয়? কি না হয় চেষ্টায়?  
অভ্যাসে চটপট হাত পাকে শেষটায়।  
খেটে খুটে জল হ'ল শরীরের রক্ত-  
শিখে দেখি বিদ্যোটা নয় কিছু শক্ত।  
কাটা ছেঁড়া ঠুক ঠাক। কত দেখ যন্ত্র,  
ভেঙে চুরে জুড়ে দেই তারও জানি মন্ত্র  
চোখ বুজে চটপট বড় বড় মূর্তি,  
যত কাটি ঘ্যাস্ ঘ্যাস্ তত বাড়ে ফুর্তি।  
ঠ্যাং কাটা গলা কাটা কত কাটা হস্ত,  
শিরিষের আঠা দিয়ে জুড়ে দেয় চোস্ত।  
এইবারে বলি তাই, রোগী চাই জ্যান্ত-  
ওরে ভোলা, গোটাছয় রোগী ধরে আস্ত!

গেঁটেবাত্তে ভুগে মরে ও পাড়ার নন্দী,  
কিছুতেই সারাবে না এই তার ফন্দি-  
একদিন এনে তারে এইখানে ভুলিয়ে,  
গেঁটেবাত্তে যেঁটে- যুঁটে সব দেব ঘুলিয়ে।  
কার কানে কট্ কট্ কার নাকে সর্দি,  
এস, এস, ভয় কিসে? আমি আছি বদ্যি।  
শুয়ে কে রে? ঠ্যাং ভাঙা? ধরে আন্ এখেনে-  
স্ক্রুপ্ দিয়ে এঁটে দিব কি রকম দেখে নে।  
গলা ফোলা কাঁদ কেন? দাঁতে বুঝি বেদনা?  
এস এস ঠুকে দেই আর মিছে কেঁদ না,  
এই পাশে গোটা দুই, ওই পাশে তিনটে-  
দাঁতগুলো টেনে দেখি কোথা গেল চিমটে?  
ছেলে হও, বুড়ো হও, অন্ধ কি পঙ্গু,  
মোর কাছে ভেদ নাই, কলেরা কি ডেঙ্গু-  
কালাজ্বর, পালাজ্বর, পুরানো কি টাটকা,  
হাতুড়ির একঘায়ে একেবারে আটকা!

### চোর ধরা

আর ছি ছি! রাম রাম! ব'লো না হে ব'লো না-  
চলছে যা জুয়াচুরি, নাহি তার তুলনা।  
যেই আমি দেই ঘুম টিফিনের আগেতে,  
ভয়ানক ক'মে যায় খাবারের ভাগেতে।

রোজ দেখি খেয়ে গেছে, জানিনেকো কারা সে-  
কালকে যা হ'য়ে গেল ডাকাতির বাড়া সে!  
পাঁচ খানা কাটেলট, লুচি তিন গন্ডা,  
গোটা দুই জিবে গজা ,গুটি দুই মন্ডা,  
আরো কত ছিল পাতে আলু ভাজা ঘুঙনি-  
ঘুম থেকে উঠে দেখি পাতখানা শূন্য!  
তাই আজ ক্ষেপে গেছি- কত আর পারব?  
এতদিন স'য়ে স'য়ে এই বারে মারব।  
খাড়া আছি সারাদিন হুসিয়ার পাহারা ,  
দেখে নেব রোজ রোজ খেয়ে যায় কাহার।  
রামু হও দামু হও, ও পাড়ার ঘোষ বোস-  
যেই হও এই বারে থেমে যাবে ফোঁস্ ফোঁস্।  
খাটবে না জারিজুরি আঁটবে না মার প্যাঁচ,  
যারে পাব ঘাড়ে ধ'রে কেটে দেব ঘ্যাঁচ ঘ্যাঁচ  
এই দেখ ঢাল নিয়ে খাড়া আছি আড়ালে,  
এই বারে টের পাবে মুন্ডুটা বাড়ালে।  
রোজ বলি "সাবধান" কানে তবু যায় না?  
ঠেলাখানা বুঝবি ত এইবারে আয় না!

### অবাক কাণ্ড

শুন্ছ দাদা! ঐ যে হোথায় বদ্যি বুড়ো থাকে,  
সে নাকি রোজ খাবার সময় হাত দিয়ে ভাত মাখে?  
শুন্ছি নাকি খিদেও পায় সারাদিন না খেলে?  
চক্ষু নাকি আপনি বোজে ঘুমটি তেমন পেলো?

চলতে গেলে ঠ্যাং নাকি তার ভূয়ের পরে ঠেকে?  
কান দিয়ে সব শোনে নাকি? চোখ দিয়ে সব দেখে?

শোয় নাকি সে মুণ্ডটাকে শিয়র পানে দিয়ে?  
হয় না কি হয় সত্যি মিথ্যা চল্ না দেখি গিয়ে!

### কিস্তুত!

বিদঘুটে জানোয়ার কিমাকার কিস্তুত,  
সারাদিন ধ'রে তার শুনি শুধু খুঁৎ খুঁৎ।  
মাঠ পারে ঘাট পারে কেঁদে মরে খালি সে,  
ঘ্যান্ ঘ্যান্ আন্দারে ঘন ঘন নালিশে।  
এটা চাই সেটা চাই কত তার বায়না-  
কি যে চায় তাও ছাই বোঝা কিছু যায়না ।  
কোকিলের মত তার কঠেতে সুর চাই,  
গলা শুনে আপনার বলে, "উছ, দুর ছাই!"

আকাশেতে উড়ে যেতে পাখিদের মানা নেই-  
 তাই দেখে মরে কেঁদে- তার কোন ডানা নেই!  
 হাতিটার কি বাহার দাঁতে আর শুভে-  
 ও রকম জুরে তার দিতে হবে মুন্ডে!  
 কাঙ্গারুর লাফ দেখে ভারি তার হিংসে-  
 ঠ্যাং চাই আজ থেকে ঢ্যাংচেঙে চিমসে!  
 সিংহের কেশরের মত তার তেজ কৈ?  
 পিছে খাসা গোসাপের খাজ কাটা লেজ কৈ?  
 একলা সে সব হলে মেটে তার প্যাখনা;  
 যারে পায় তারে বলে, "মোর দশা দেখনা!"  
 কেদেঁ কেদেঁ শেষটায়- আষাঢ়ের বাইশে  
 হল বিনা চেষ্টায় চেয়েছে যা তাই সে।  
 ভুলে গিয়ে কাঁদাকাটি আহ্লাদে আবেশে  
 চুপিচুপি একলাটি ব'সে ব'সে ভাবে সে-  
 লাফ দিয়ে হুশ্ করে হাতি কভু নাচে কি?  
 কলাগাছ খেলে পরে কাঙ্গারুটা বাঁচে কি ?  
 ভেঁতামুখে কুলুডাক শুনে লোকে কবে কি?  
 এই দেহে শুঁড়ো নাক খাপ ছাড়া হবে কি?  
 "বুড়ো হাতি ওড়ে" ব'লে কেউ যদি গালি দেয় ?  
 কান টেনে ল্যাজ মলে "দুয়ো" ব'লে তালি দেয়?  
 কেউ যদি তেড়েমেরে বলে তার সামনেই-  
 কোথাকার তুই করে, নাম নেই ধাম নেই?  
 জবাব কি দেবে ছাই, আছে কিছু বলবার?  
 কাছঁ মাছঁ বসে তাই, মনে শুধু তোলপার-  
 "নই ঘোড়া, নই হাতি, নই সাপ বিচছু  
 মৌমাছি প্রজাপতি নই আমি কিচছু।  
 মাছ ব্যাং গাছপাতা জলমাটি চেউ নই,  
 নই জুতা নই ছাতা, আমি তবে কেউ নই!"

### ন্যাড়া বেলতলায় যায় ক'বার?

রোদে রাঙা হুঁটের পঁজা, তার উপরে বসল রাজা-  
 ঠোঙাভরা বাদাম ভাজা খাচ্ছে কিন্তু গিলছে না।  
 গায়ে আঁটা গরম জামা, পুড়ে পিঠ হচ্ছে ঝামা;  
 রাজা বলে, "বৃষ্টি নামা- নইলে কিছু মিলছে না"।  
 থাকে সারা দুপুর ধ'রে, ব'সে ব'সে চুপটি করে,  
 হাঁড়িপানা মুখটি ক'রে আঁকড়ে ধরে শ্লেটটুকু;  
 যেমে যেমে উঠছে ভিজ, ভ্যাবাচ্যাকা একলা নিজে,  
 হিজিবিজি লিখেছ কি যে বুঝেছ না কেউ একটুকু।

ঝাঁঝা রোদ আকাশ জুড়ে, মাথাটার ঝাঝরা ফুঁড়ে,  
 মগজেতে নাচ্ছে ঘুরে রক্তগুলো ঝনর ঝন:  
 ঠাঠা-পড়া দুপুর দিনে, রাজা বলে "আর বাঁচিনে,

ছুটে আন্ বরফ কিনে- ক'ছে কেমন গা ছনছন।"  
সবে বলে, "হায় কি হল! রাজা বুঝি ভেবেই মোলো।  
ওগো রাজা মুখিট খোল- কওনা ইহার কারণ কি?  
রাঙামুখ পান্সে যেন, তেলে ভাজা আম্সি হেন,  
রাজা এত ঘামছে কেন- শুনতে মোদের বারণ কি"?

রাজা বলে, "কেইবা শোনে যে কথাটা ঘুরছে মনে,  
মগজের নানান কোণে- আনছি টেনে বাইরে তায়;  
সে কথাটি বলছি শোন, যতই ভাব যতই গোন,  
নাহি তার জবাব কোন কুলকিনারা নাইরে হায়।  
লেখা আছে পুথির পাতে, 'নেড়া যায় বেলতলাতে',  
নাহি কোনো সন্ধ তাতে - কিন্তু প্রশ্ন ক'বার যায়?  
এ কথাটা এদিনেও পারে নিকো বুঝতে কেও,  
লেখে নিকো পুস্তকেও, দিচ্ছে না কেউ জবাব তায়।

লাখোবার যায় যদি সে, যাওয়া তার ঠেকায় কিসে?  
ভেবে তাই পাইনে দিশে নাই কি কিছু উপায় তার?"  
এ কথাটা যেম্মি বলা, রোগা এক ভিস্তিওলা  
টিপ্ ক'রে বাড়িয়ে গলা প্রণাম করল দু'পায় তাঁর।  
হেসে বলে, "আজ্ঞে সে কি?, এতে আর গোল হবে কি?  
নেড়াকে তো নিত্য দেখি আপন চোখে পরিষ্কার-  
আমাদেরি বেলতলা যে, নেড়া সেথা খেলতে আসে  
হরে দরে হয়তো মাসে নিদেন পক্ষে পঁচিশ বার"।

## বুঝিয়ে বলা

ও শ্যামাদাস! আয় ত দেখি ব'স্ তো দেখি এখানে,  
সেই কথাটা বুঝিয়ে দেব পাঁচ মিনিটে দেখে নে।  
জ্বর হয়েছে? মিথ্যে কথা! ওসব তোদের চালাকি-  
এই যে বাবা চঁচাচ্ছিলে, শুনতে পাইনি? কালা কি?  
মামার ব্যামো? বদ্যি ডাকবি? ডাকিস না হয় বিকেলে;  
না হয় আমি বাৎলে দেব বাঁচবে মামা কি খেলে।  
আজকে তোকে সেই কথাটা বোঝাবই বোঝাব-  
না বুঝবি ত মগজে তোর গজাল মেরে গাঁজাব।  
কোন কথাটা? তাও ভুলেছিস? ছেড়ে দিছিস হাওয়াতে?  
কি বলছিলেম পরশ রাতে বিষ্টু বোসের দাওয়াতে?  
ভুলিসনি ত বেশ করেছিস, আবার শুনলে ক্ষেতি কি?  
বড় যে ভুই পালিয়ে বেড়াস, মাড়াসনে যে এদিক্ই!  
বলছি দাঁড়া, ব্যস্ত কেন? বোস্ তাহলে নিচুতেই-  
আজকালের এই ছোকরা গুলোর তর্ সয় না কিছুতেই।  
আবার দেখ! বসলি কেন? বই গুলো আন্ নামিয়ে-

তুই থাকতে মুটের বোঝা বইতে যাব আমি এ?  
সাবধানে আন, ধরছি দাঁড়া- সেই আমাকেই ঘামালি-  
এই খেয়েছে! কোন্ আক্কেলে শব্দকোষটা নামালি?  
ঢের হয়েছে! আয় দেখি তুই বোস্ ত দেখি এদিকে-  
ওরে গোপাল, গোটা কয়েক পান দিতে বল্ খেঁদিকে।  
বলছিলাম কি, বস্তুপিণ্ড সূক্ষ্ম হতে স্থুলেতে,  
অর্থাৎ কিনা লাগছে ঠেলা পঞ্চভূতের মূলেতে-  
গোড়ায় তবে দেখতে হবে কোথেকে আর কি ক'রে,  
রস জমে এই প্রপঞ্চময় বিশ্বতরুর শিকড়ে।  
অর্থাৎ কিনা, এই মনে কর্ রোদ পড়েছে ঘাসেতে,  
এই মনে কর, চাঁদের আলো পড়লো তারি পাশেতে-  
আবার দেখ! এরই মধ্যে হাই তোলবার মানে কি?  
আকাশ পানে তাকাস্ খালি, যাচ্ছে কথা কানে কি?  
কি বল্লি তুই? এ সব শুধু আবোল তাবোল বকুনি?  
বুঝতে হলে মগজ লাগে, বলেছিলাম তখুনি।  
মগজভরা গোবর তোদের হচ্ছে ঘুঁটে শুকিয়ে,  
যায় কি দেওয়া কোন কথা তার ভিতরে ঢুকিয়ে? -  
ও শ্যামাদাস! উঠলি কেন? কেবল যে চাস্ পালাতে!  
না শুনবি ত মিথ্যে সবাই আসিস্ কেন জ্বালাতে?  
তড়ুকাথা যায় না কানে যতই মরি চেষ্টিয়ে-  
ইচ্ছে করে ডানপিটাদের কান মলে দি পৌঁচিয়ে।

### বুড়ীর বাড়ি

গালভরা হাসিমুখে চালভাজা মুড়ি,  
ঝুরঝুরে পড়ো ঘরে থুর থুরে বুড়ী।  
কাঁথাভরা ঝুলকালি, মাথাভরা ধলো,  
মিট্টিটে ঘোলা চোখ, পিঠখানা কুলো।  
কাঁটা দিয়ে আঁটা ঘর- আঠা দিয়ে সঁটে,  
সুতো দিয়ে বেঁধে রাখে থুতু দিয়ে চেটে।  
ভর দিতে ভয় হয় ঘর বুঝি পড়ে,  
ককক কাশি দিলে ঠকঠক নড়ে।  
ডাকে যদি ফিরিওলা হাঁকে যদি গাড়ি,  
খসে পড়ে কড়িকাঠ ধসে পড়ে বাড়ী।  
বাঁকাচোরা ঘরদোর ফাঁকা ফাঁকা কত,  
ঝাঁট দিলে ঝরে পড়ে কাঠকুটো যত।  
ছাদ গুলো ঝুলে পড়ে বাস্লাম ভিজ়ে,  
একা বুড়ি কাঠী গুজে ঠেকা দেয় নিজে।  
মেরামত দিন রাত কেরামত ভারি,  
থুরথুরে বুড়ী তার ঝুরঝুরে বাড়ী।



## বোম্বাগড়ের রাজা

কেউ কি জান সদাই কেন বোম্বাগড়ের রাজা-  
ছবির ফ্রেমে বাঁধিয়ে রাখে আমসত্ত্ব ভাজা?  
রানীর মাথায় অষ্টপ্রহর কেন বালিশ বাঁধা?  
পাঁউরুটিতে পেরেক ঠোকে কেন রানীর দাদা?  
কেন সেথায় সর্দি হলে ডিগবাজি খায় লোকে?  
জোছনা রাতে সবাই কেন আলতা মাথায় চোখে?  
ওস্তাদেরা লেপ মুড়ি দেয় কেন মাথায় ঘাড়ে?  
টাকের পরে পন্ডিতেরা ডাকের টিকিট মারে।  
রাত্রে কেন ট্যাকঘড়িটা ডুবিয়ে রাখে ঘিয়ে।  
কেন রাজার বিছনা পাতে শিরীষ কাগজ দিয়ে?  
সভায় কেন চেঁচায় রাজা "ছক্কা ছয়া" বলে?  
মন্ত্রী কেন কলসী বাজায় বসে রাজার কোলে?  
সিংহাসনে ঝোলায় কেন ভাঙা বোতল শিশি?  
কুমড়ো নিয়ে ক্রিকেট খেলে কেন রাজার পিসী?  
রাজার খুড়ো নাচেন কেন হুকোর মালা পরে?  
এমন কেন ঘটছে তা কেউ বলতে পার মোরে?

## ঠিকানা

আরে আরে জগমোহন- এস ,এস,এস-  
বলতে পার কোথায় থাকে আদ্যনাথের মেশো?  
আদ্যনাথের নাম শোননি? খগেনকে তো চেনো?  
শ্যাম বাগচি খগেনেরই মামাশ্বশুর জেনো।  
শ্যামের জামাই কেষ্টমোহন, তার যে বাড়ীওলা-  
(কি যেন নাম ভুলে গেছি), তারই মামার শালা;  
তারই পিশের খড়তুতো ভাই আদ্যনাথের মেশো-  
লক্ষী দাদা ,ঠিকানা তার একটু জেনে এসো।  
ঠিকানা চাও? বলছি শোন; আমড়াতলার মোড়ে  
তিন-মুখো তিন রাস্তা গেছে তারি একটা ধ'রে,  
চলবে সিধে নাক বরাবর, ডান দিকে চোখ রেখে;  
চলতে চলতে দেখবে শেষে রাস্তা গেছে বঁকে।  
দেখবে সেথায় ডাইনে বায়ে পথ গিয়াছে কত,  
তারি ভিতর ঘুরবে খানিক গোলকর্ধাধার মত।  
তারপরেতে হঠাৎ বঁকে ডাইনে মোচর মেরে ,  
ফিরবে আবার বাঁয়ের দিকে তিনটে গলি ছেড়ে।  
তবেই আবার পড়বে এসে আমড়া তলার মোড়ে-  
তারপরে যাও যেথায় খুশি- জ্বালিয়ে নাকো মোরে ।

## একুশে আইন

শিবঠাকুরের আপন দেশে ,  
আইন কানুন সর্বনেশে!  
কেউ যদি যায় পিছলে প'ড়ে,  
প্যাযদা এসে পাকড়ে ধরে ,  
কাজির কাছে হয় বিচার-

একুশ টাকা দন্ড তার।।

সেথায় সন্ধে ছটার আগে  
হাঁচতে হলে টিকিট লাগে  
হাঁচলে পরে বিন্ টিকিটে  
দম্াদমাদম্ লাগায় পিঠে ,  
কোটাল এসে নসিয় ঝাড়ে-

একুশ দফা হাচিয়ে মারে।।

কারুর যদি দাতটি নড়ে,  
চার্টি টাকা মাশুল ধরে ,  
কারুর যদি গৌফ গজায় ,  
একশো আনা ট্যাক্সো চায়-  
খুঁচিয়ে পিঠে গুঁজিয়ে ঘাড়,

সেলাম ঠোকায় একুশ বার।।

চলতে গিয়ে কেউ যদি চায়  
এদিক্ ওদিক্ ডাইনে বাঁয়,  
রাজার কাছে খবর ছোট্টে,  
পল্টনেরা লাফিয়ে ওঠে ,  
দুপুরে রোদে ঘামিয়ে তায়-

একুশ হাতা জল গেলায়।।

যে সব লোকে পদ্য লেখে,  
তাদের ধরে খাঁচায় রেখে,  
কানের কাছে নানান্ সুরে

নামতা শোনায় একশো উড়ে,  
সামনে রেখে মুদীর খাতা-  
হিসেব কষায় একুশ পাতা।।  
হঠাৎ সেথায় রাত দুপুরে  
নাক ডাকালে ঘুমের ঘোরে,  
অমনি তেড়ে মাথায় ঘষে,  
গোবর গুলে বেলের কষে,  
একুশটি পাক ঘুরিয়ে তাকে-  
একশ ঘন্টা ঝুলিয়ে রাখে।।

### বিজ্ঞান শিক্ষা

আয় তোর মুন্ডুটা দেখি, আয় দেখি "ফুটোস্কোপ" দিয়ে,  
দেখি কত ভেজালের মেকি আছে তোর মগজের ঘিষে।  
কোন দিকে বুদ্ধিটা খোলে, কোন দিকে থেকে যায় চাপা;  
কতখানি ভস্ ভস্ ঘিলু, কত খানি ঠক্ ঠকে কাপাঁ।  
মন তোর কোন দেশে থাকে, কেন তুই ভুলে যাস্ কথা-  
আয় দেখি কোন ফাঁক দিয়ে, মগজেতে ফুটো তোর কোথা।  
টোল-খাওয়া ছাতাপড়া মাথা, ফাটামত মনে হয় যেন,  
আয় দেখি বিশ্লেষ ক'রে- চোপ্ রও ভয় পাস কেন?  
কাৎ হয়ে কান ধ'রে দাঁড়া, জিভখানা উল্টিয়ে দেখা,  
ভালো ক'রে বুঝে শুনে দেখি- বিজ্ঞানে যে রকম লেখা।  
মুন্ডুতে ম্যাগনেট ফেলে, বাশঁ দিয়ে "রিফ্লেকট" ক'রে,  
ইট দিয়ে ভেলসিটি ক'ষে, দেখি মাথা ঘোরে কি না ঘোরে।

## হুকোমুখো হ্যাংলা

হুকোমুখো হ্যাংলা বাড়ী তার বাঙলা  
মুখে তার হাসি নাই, দেখেছ?  
নাই তার মানে কি? কেউ তাহা জানে কি?  
কেউ কভু তার কাছে থেকেছ?

শ্যামাদাস মামা তার আপিঙের থানাদার,  
আর তার কেউ নাই এছাড়া-  
তাই বুঝি একা সে মুখ খানা ফ্যাকাশে,  
ব'সে আছে কাঁদ কাঁদ বেচারী?

থপ থপ পায়ে সে নাচত যে আয়েসে,  
গাল ভরা ছিল তার ফুর্তি,  
গাইত সে সারাদিন "সারে গামা টিম্ টিম্,  
আহ্লাদে গদ-গদ মূর্তি!

এই তো সে দুপু'রে বসে ওই উপরে,  
খাচ্ছিল কাঁচকলা চটকে-  
ওর মাঝে হল কি? মামা তার মোলো কি?  
অথবা কি ঠ্যাং গেল মটকে?

হুকো মুখো হেঁকে কয়, আরে দূর, তা তো নয়,  
দেখ না কি রকম চিন্তা?  
মাছি মারা ফন্দি এ যত ভাবি মন দিয়ে-  
ভেবে ভেবে কেটে যায় দিনটা।

বসে যদি ডাইনে, লেখে মোর আইনে-  
এই ল্যাঙ্গে মাছি মারি এস্ত;  
বামে যদি বসে তাও, নাহি আমি পিছপাও,  
এই ল্যাঙ্গে আছে তার অস্ত্র!

যদি দেখি কোন পাজি বসে ঠিক মাঝামাঝি,  
কি যে করি ভেবে নাহি পাইরে-

ভেবে দেখ একি দায়, কোন্ ল্যাজে মারি তায়  
ছুটি বই ল্যাজ মোর নাই রে!

### দাঁড়ে দাঁড়ে দ্রুম!

ছুটছে মোটর ঘটর্ ঘরটর্ ছুটছে গাড়ী জুড়ি;  
ছুটছে লোকে নানান্ বোকে করছে হুড়োহুড়ি ;  
ছুটছে কত ক্ষ্যপার মত পড়ছে কত চাপা-  
সাহেব মেম থমকে থেমে বলছে "মামা! পাপা!"  
- আমরা তবু তবলা ঠুকে গাছি কেমন তেড়ে।  
"দাঁড়ে দাঁড়ে দ্রুম! দেড়ে দেড়ে দেড়ে!"  
বর্ষাকালের বৃষ্টিবাদল রাস্তা জুড়ে কাদা,  
ঠান্ডা রাতে সর্দিবাতে মরবি কেন দাদা?  
হোক না সকাল হোক না বিকেল হোক না দুপুর বেলা,  
থাক না তোমার আফিস যাওয়া থাক না কাজের ঠেলা-  
এই দেখ না চাঁদনি রাতের গান এনেছি কেড়ে,  
"দাঁড়ে দাঁড়ে দ্রুম্ ! দেড়ে দেড়ে দেড়ে!"  
মুখ্য যারা হচেছ সারা পড়েছ ব'সে একা ,  
কেউ বা দেখ কাঁচুর মাচুর কেউ বা ভ্যাবাচ্যাকা;  
কেউ বা ভেবে হৃদ হল, মুখটি যেন কালি ;  
কেউ বা বসে বোকার মত মুড্ডু নাড়ে খালি।  
তার চেয়ে ভাই, ভাবনা ভুলে গাও না গলা ছেড়ে,  
"দাঁড়ে দাঁড়ে দ্রুম্ ! দেড়ে দেড়ে দেড়ে!"  
বেজার হয়ে যে যার মত করছ সময় নষ্ট-  
হাটছ কত খাটছ কত পাচছ কত কষ্ট!  
আসল কথা বুঝছ না যে, করছ না যে চিন্তা,  
শুনছ না যে গানের মাঝে তবলা বাজে খিনতা?  
পাল্লা ধ'রে গায়ের জোরে গিটিকরি দাও ঝেড়ে,  
"দাঁড়ে দাঁড়ে দ্রুম্ ! দেড়ে দেড়ে দেড়ে!"

## রামগরুড়ের ছানা

রামগরুড়ের ছানা হাসতে তাদের মানা,  
হাসির কথা শুনলে বলে,  
"হাসব্ না-না, না-না"।  
সদাই মরে ত্রাসে- ঐ বুঝি কেউ হাসে!  
এক চোখে তাই মিটমিটিয়ে  
তাকায় আশে পাশে।  
ঘুম নাহি তার চোখে আপনি বকে বকে  
আপনারে কয়, "হাসিস্ যদি  
মারব কিন্তু তোকে!"  
যায় না বনের কাছে, কিম্বা গাছে গাছে,  
দখিন হাওয়ার সুড়সুড়িতে  
হাসিয়ে ফেলে পাছে।  
সোয়ান্তি নেই মনে- মেঘের কোণে কোণে  
হাসির বাষ্প উঠছে ফেঁপে  
কান পেতে তাই শোনে।  
ঝোপের ধারে ধারে রাতের অন্ধকারে  
জোনাক জ্বলে আলোর তালে  
হাসির ঠারে ঠারে ।  
হাসতে হাসতে যারা হচ্ছে কেবল সারা  
রামগরুড়ের লাগছে ব্যথা  
বুঝছে না কি তারা?  
রামগরুড়ের বাসা ধমক দিয়ে ঠাসা,  
হাসির হাওয়া বন্ধ সেথায়  
নিষেধ সেথায় হাসা।

## ডানপিটে

বাপরে কি ডানপিটে ছেলে!-  
কোন দিন ফাঁসি যাবে নয় যাবে জেলে।  
একটা সে ভুত সেজে আঠা মেখে মুখে,  
ঠাই ঠাই শিশি ভাঙে প্লেট দিয়ে ঠুকে।  
অন্যটা হামা দিয়ে আলমারি চড়ে,  
খাট থেকে রাগে ক'রে দুমদাম পড়ে।

বাপরে কি ডানপিটে ছেলে!-  
শিলনোড়া খেতে চায় দুধভাত ফেলে!  
একটার দাঁত নেই, জিভ দিয়ে ঘষে,  
একমনে মোমবাতি দেশলাই চোষে!  
আরজন ঘরময় নীল কালি গুলে,  
কপ্ কপ্ মাছি ধরে মুখে দেয় তুলে!

বাপরে কি ডানপিটে ছেলে!-  
খুন হ'ত টম্ চাচা ওই রুটি খেলে!  
সন্দেহে গুঁকে বুড়ো মুখে নাহি তোলে,  
রেগে তাই দুই ভাই ফোঁস্ ফোঁস্ ফোলে!  
নেড়াচুল খাড়া হয়ে রাজা হয় রাগে,  
বাপ্ বাপ্ ব'লে চাচা লাফ দিয়ে ভাগে।



নারদ! নারদ!

"হ্যারে হ্যারে তুই নাকি কাল, সাদাকে বলছিলি লাল?  
(আর) সেদিন নাকি রাত্রি জুড়ে, নাক ডেকেছিস্ বিশী সুরে?  
(আর) তোদের পোষা বেড়ালগুলো, শুনছি নাকি বেজায় হুলো?  
(আর) এই যে শনি তোদের বাড়ি, কেউ নাকি রাখে না দাড়ি?  
ক্যান রে ব্যাটা ইসটুপিড? ঠেঙিয়ে তোরে করব টিট!"  
"চোপরাও তুম্ স্পিকটি নট্, মার্ব রেগে পটাপট্-  
ফের যদি ট্যারাবি চোখ, কিম্বা আবার করবি রোখ,  
কিম্বা যদি অম্নি ক'রে, মিথ্যেমিথ্যি চ্যাচাস জোরে-  
আই ডোন্ট কেয়ার কানাকড়ি- জানিস্ আমি স্যাভো করি?"  
"ফের লাফাচ্ছিস্! অলরাইট, কামেন্ ফাইট ! কামেন্ ফাইট!"  
"ঘুমু দেখেছ, ফাঁদ দেখনি, টেরটা পাবে আজ এখনি!  
আজকে যদি থাক্ত মামা, পিটিয়ে তোমায করত ধামা।"  
"আরে! আরে! মার্বি নাকি? দাঁড়া একটা পুলিশ ডাকি!"  
"হাঁহাঁহাঁ! রাগ করো না, করতে চাও কি তাই বল না।"  
"হাঁ হাঁ তাতো সত্যি বটেই, আমি তো চটিনি মোটেই!  
মিথ্যে কেন লড়তে যাবি? ভেরি- ভেরি সরি মশলা খাবি?"  
"শেকহ্যান্ড আর দাদা বল, সব শোধ বোধ ঘরে চল।"  
"ডোন্ট পরোয়া অল্ রাইট্, হাউ ডু য়ু ডু গুড্ নাইট।"

ট্যাশ গরু

ট্যাশ্ গরু নয়, আসলেতে পাখি সে;  
যার খুশি দেখে এস হরুদের আফিসে।  
চোখ দুটি ঢুলু ঢুলু, মুখখান মস্ত,  
ফিট্ফাট্ কালোচুলে টেরিকাটা চোস্ত।  
তিন-বাঁকা শিং তার ল্যাজখানি প্যাঁচান-  
একটুকু হেঁও যদি, বাপরে কি চ্যাঁচান!  
লটখটে হাড়গোড় খট্খট্ ন'ড়ে যায়,  
ধমকালে ল্যাগব্যাগ চমকিয়ে প'ড়ে যায়।  
বর্ণিতে রূপ গুণ সাধ্য কি কবিতার,  
চেহারার কি বাহার- ঐ দেখ ছবি তার।  
ট্যাশ্ গরু খাবি খায় ঠ্যাগ্ দিয়ে দেয়ালে,  
মাঝে মাঝে কেঁদে ফেলে না জানি কি খেয়ালে ;  
মাঝে মাঝে তেড়ে ওঠে, মাঝে মাঝে রেগে যায়,  
মাঝে মাঝে কুপোকাৎ দাঁতে দাঁত লেগে যায়।

খায় না সে দানাপানি- ঘাস পাতা বিচালি  
খায় না সে ছোলা ছাতু ময়দা কি পিঠালি;  
রুচি নাই আমিষেতে, রুচি নাই পায়েসে  
সাবানের সুপ আর মোমবাতি খায় সে।  
আর কিছু খেলে তার কাশি ওঠে খক্খক্,  
সারা গায়ে ঘিন্ ঘিন্ ঠ্যাং কাঁপে ঠক্ঠক্।  
একদিন খেয়েছিল ন্যাকড়ার ফালি সে-  
তিন মাস আধমরা শুয়েছিল বালিশে।  
কারো যদি শখ্ থাকে ট্যাশ্ গরু কিন্তে ,  
সস্তায় দিতে পারি, দেখ ভেবে চিন্তে।

### ফস্কে গেল

দেখ বাবাজি দেখবি নাকি দেখরে খেলা দেখ্ চালাকি,  
ভোজের বাজি ভেঙ্কি ফাঁকি পড়্ পড়্ পড়্ পড়বি পাখি - ধপ!

লাফ দিয়ে তাই তালটি ঠুকে তাক করে যাই তীর ধনুকে,  
ছাড়ব সটান উর্ধ্বমুখে হুশ করে তোর লাগবে বুকে - খপ!  
গুড় গুড় গুড় গুড়িয়ে হামা খাপ্ পেতেছেন গোষ্ঠ মামা  
এগিয়ে আছেন বাগিয়ে ধামা এইবার বাণ চিড়িয়া নামা - চট!  
ঐ যা! গেল ফক্ষে ফেসে - হেই মামা তুই ক্ষেপলি শেষে?  
ঘ্যাট করে তোর পাজর যেঁষে লাগল কি বাণ ছটকে এসে- ফট?

**কি মুঞ্চিল!**

সব লিখেছে এই কেতাবে দুনিয়ার সব খবর যত,  
সরকারী সব আফিসখানার কোন্ সাহেবের কদর কত।  
কেমন ক'রে চাটনি বানায়, কেমন ক'রে পোলাও করে,

হরেক্ রকম মুষ্টিযোগের বিধান লিখে ফলাও ক'রে।  
সাবান কালি দাঁতের মাজন বানাবার সব কায়দা কেতা,  
পূজা পার্বণ তিথির হিসাব শ্রাদ্ধবিধি লিখে হেতা।  
সব লিখেছে, কেবল দেখ পাচ্ছিনাকো লেখা কোথায়--  
পাগলা ষাঁড়ে করলে তাড়া কেমন ক'রে ঠেকাব তায়!

### ভূতুড়ে খেলা

পরশু রাতে পষ্ট চোখে দেখনু বিনা চশমাতে,  
পান্তভুতের জ্যাস্ত ছানা করছে খেলা জোছনাতে।  
কছে খেলা মায়ের কোলে হাত পা নেড়ে উল্লাসে,  
আহাদেতে ধুপ্পুপিয়ে কছে কেমন হল্লা সে।

শুনতে পেলাম ভূতের মায়ের মুচুকি হাসি কটকটে-  
দেখছে নেড়ে ঝুন্টি ধ'রে বাচ্চা কেমন চটপটে।  
উঠছে তাদের হাসির হানা কাঠ সুরে ডাক ছেড়ে,  
খ্যাশ খ্যাশানি শব্দে যেমন করাৎ দিয়ে কাঠ চেরে!  
যেমন খুশি মারছে ঘুঁষি দিচ্ছে কষে কানমলা,  
আদর ক'রে আছাড় মেরে শূন্যে ঝোলে চ্যাং দোলা।  
বলেছ আবার, "আয়রে আমার নোংরামুখে সুটকো রে,  
দেখ না ফিরে প্যাখনা ধরে হতোম-হাসি মুখ ক'রে !  
ওরে আমার বাঁদর নাচন আদর গেলা কোৎকা রে!  
অন্ধবনের গন্ধ-গোকুল, ওরে আমার হোঁৎকা রে!  
ওরে আমার বাদলা রোদে জষ্ঠি মাসের বিষ্টিরে।  
ওরে আমার হামান ছেচা যষ্টিমধুর মিষ্টিরে।  
ওরে আমার রান্না হাঁড়ির কান্না হাসির ফোড়নদার,  
ওরে আমার জোছনা হাওয়ার স্বপ্নঘোড়ার চড়নদার।  
ওরে আমার গোবরাগণেশ ময়দাঠাসা নাদুসরে,  
ছিঁচকাঁদুনে ফোকলা মানিক ফের যদি তুই কাঁদিসরে-"  
এই না ব'লে যেই মেরেছে কাদার চাপটি ফট করে,  
কোথায় বা কি ভূতের ফাঁকি - মিলিয়ে গেল চট ক'রে!

## আহ্লাদী

হাসছি মোরা হাসছি দেখ, হাসছি মোরা আহাদী,  
তিন জনেতে জটলা ক'রে ফোকলা হাসির পাল্লা দি।  
হাসতে হাসতে আসছে দাদা, আসছি আমি, আসছে ভাই,  
হাসছি কেন কেউ জানে না, পাচ্ছে হাসি হাসছি তাই।  
ভাবছি মনে, হাসছি কেন? থাকব হাসি ত্যাগ করে,  
ভাবতে গিয়ে ফিকফিকিয়ে ফেলছি হেসে ফ্যাক ক'রে।  
পাচ্ছে হাসি চাপতে গিয়ে, পাচ্ছে হাসি চোখ বুজে,  
পাচ্ছে হাসি চিমটি কেটে নাকের ভিতর নোখ গুজে।  
হাসছি দেখে চাঁদের কলা জোলায় মাকু জেলের দাঁড়

নৌকা ফানুস পিপড়ে মানুষ রেলের গাড়ী তেলের ভাঁড়।  
পড়তে গিয়ে ফেলছি হেসে 'ক খ গ' আর শ্লেট দেখে-  
উঠছে হাসি ভস্ভসিয়ে সোডার মতন পেট থেকে।

## কাঁদুনে

ছিঁচ কাঁদুনে মিচকে যারা শস্তা কেঁদে নাম কেনে,

ঘ্যাঙায় শুধু ঘ্যান ঘ্যান ঘ্যান্ম্যানে আর প্যান্া-  
কুকিয়ে কাঁদে খিদের সময়, ফুঁপিয়ে কাঁদে ধম্কালা,  
কিন্মা হঠাৎ লাগলে ব্যথা, কিন্মা ভয়ে চমকালে;  
অল্পে হাসে অল্পে কাঁদে কান্না থামায় অল্পেতেই ,  
মাযের আদর দুধের বোতল কিন্মা দিদির গল্পেতেই -  
তারেই বলি মিথ্যে কাঁদন; আসল কান্না শুনবে কে?  
অবাক হবে থম্কে রবে সেই কাঁদনের গুণ দেখে!  
নন্দঘোষের পাশের বাড়ী বুথ সাহেবের বাচ্চটার  
কান্না খানা শুনলে বলি কান্না বটে সান্না তার ।

কাঁদবে না সে যখন তখন, রাখবে কেবল রাগ পুষে,  
কাঁদবে যখন খেয়াল হবে খুন-কাঁদুনে রাস্কুসে!  
নাইক কারণ নাইক বিচার মাঝরাতে কি ভোরবেলা,  
হঠাৎ শুনি অর্থবিহিন আকাশ-ফাটন জোর গলা।  
হাঁকড়ে ছোটো কান্না, যেমন জোয়ার বেগে নদীর বান,  
বাপ মা বসেন হতাশ হয়ে, শব্দ শুনে বধির কান।  
বাস্রে সে কি লোহার গলা? এক মিনিটও শান্তি নেই?  
কাঁদন ঝরে শ্রাবণ ধারে, ক্ষান্ত দেবার নামটি নেই!  
ঝুম্ ঝুমি দাও, পুতুল নাচাও, মিষ্টি খাওয়াও একশোবার,  
বাতাস কর, চাপড়ে ধর, ফুটবে নাকো হাস্য তার।  
কান্নাভরে উল্টে পড়ে কান্না ঝরে নাক দিয়ে,  
গিলতে চাহে দালানবাড়ী হাঁ খানি তার হাঁক দিয়ে।  
ভূত- ভাগান শব্দে লোকে ত্রাহি ত্রাহি ডাক ছাড়ে -  
কান্নাশুনে ধন্য বলি বুথ্ সাহেবের বাচ্চারে।

## হুলোর গান

বিদম্বুটে রাঙিরে ঘুটেঘুটে ফাঁকা,  
গাছপালা মিশ্‌মিশে মখমলে ঢাকা।  
জটবাঁধা ঝুল্ কালো বটগাছতলে,  
ধক ধক জোনাকির চকমকি জ্বলে  
চুপ্‌চাপ চারিদিকে ঝোপঝাড়গুলো-  
আয়্ ভাই গান গাই আয়্ ভাই হুলো।

গীত গাই কানে কানে চীৎকার ক'রে,  
কোন গানে মন ভেজে শোন্ বলি তোরে-  
পুবদিকে মাঝ রাতে ছোপ্ দিয়ে রাঙা।  
রাতকানা চাঁদ ওঠে আধখানা ভাঙা।  
চট্ ক'রে মনে পড়ে মটকার কাছে  
মালপোয়া আধখানা কাল থেকে আছে;

দুড়্ দুড়্ ছুটে যাই দূর থেকে দেখি  
প্রাণপণে ঠোঁট চাটে কানকাটা নেকী!  
গালফোলা মুখে তার মালপোয়া ঠাসা  
ধুক ক'রে নিভে গেলে বুকভরা আশা;  
মন বলে আর কেন সংসারে থাকি  
বিল্কুল্ সব দেখি ভেক্কির ফাঁকি।

সব যেন বিচ্ছিরি সব যেন খালি,  
গিন্মীর মুখ যেন চিম্নির কালি।  
মন ভাঙা দুখ্ মোর কঠেতে পুরে  
গান গাই আয়্ ভাই প্রাণফাটা সুরে।

## হাত গণনা

ও পাড়ার নন্দ গৌসাই, আমাদের নন্দ খুড়ো,  
স্বভাবেতে সরল সোজা অমায়িক শান্ত বুড়ো।  
ছিল না তার অসুখ বিসুখ, ছিল সে যে মনের সুখে,  
দেখা যেত সদাই তারে হুকোহাতে হাস্যমুখে।  
হঠাৎ কি তার খেয়াল হ'ল চলল্ সে তার হাত দেখাতে-  
ফিরে এল শুকনো সরু, ঠকাঠক্ কাঁপছে দাঁতে  
শুধালে সে কয় না কথা, আকাশেতে রয় সে চেয়ে,  
মাঝে মাঝে শিউরে ওঠে, পড়ে জল চক্ষু বেয়ে।  
শুনে লোকে দৌড়ে এল, ছুটে এলেন বদ্যিমশাই,  
সবাই বলে, "কাঁদছ কেন? কি হয়েছে নন্দ গৌসাই?"  
খুড়ো বলে, "বলব কি আর হাতে আমার স্পষ্ট লেখা  
আমার ঘাড়ে আছেন শনি, ফাঁড়ায় ভরা আয়ুর রেখা।  
এতদিন যায়নি জানা ফিরছি কত গ্রহের ফেরে-  
হঠাৎ আমার প্রাণটা গেলে তখন আমায় রাখবে কে রে?  
ষাটটা বছর পার হয়েছি বাপদাদাদের পুণ্যফলে-  
ওরে তোদের নন্দ খুড়ো এবার বুঝি পটোল তোলে।



কবে যে কি ঘটবে বিপদ কিছু হয় যায় না বলা"-

এই ব'লে সে উঠলো কেঁদে ছেড়ে ভীষণ উচ্চ গলা।

দেখে এলাম আজ সকালে গিয়ে ওদের পাড়ার মুখো,

বুড়ো আছে, নেই কো হাসি, হাতে তার নেই কো হুকো।

## গন্ধ বিচার

সিংহাসনে বসল রাজা বাজল কাঁসর ঘন্টা,  
ছটফটিয়ে উঠল কেঁপে মন্ত্রীবুড়োর মনটা।  
বললে রাজা, "মন্ত্রী, তোমার জামায় কেন গন্ধ?"  
মন্ত্রী বলে, "এসেন্স দিছি- গন্ধ ত নয় মন্দ!"  
রাজা বলেন, "মন্দ ভালো দেখুক শুঁকে বদ্যি,"  
বদ্যি বলে, "আমার নাকে বেজায় হল সর্দি।"  
রাজা হাঁকেন, "বোলাও তবে- রাম নারায়ণ পাত্র।"  
পাত্র বলে, "নস্যি নিলাম এফনি এইমাত্র-  
নস্যি দিয়ে বন্ধ যে নাক, গন্ধ কোথায় ঢুকবে?"  
রাজা বলেন, "কোটাল তবে এগিয়ে এস শুকবে।"  
কোটাল বলে, "পান খেয়েছি মশলা তাহে কর্পূর,  
গন্ধে তারি মুন্ড আমার এক্কেবারে ভরপুর।"  
রাজা বলেন, "আসুক তবে শের পালোয়ান ভীমসিং,"  
ভমি বলে, "আজ কচ্ছে আমার সমস্ত গা ঝিম্ ঝিম্  
রাত্রে আমার বোখার হল, বলছি হুজুর ঠিক বাৎ"-  
ব'লেই শুল রাজসভাতে চক্ষু বুজে চিৎপাত।  
রাজার শালা চন্দ্রকেতু তারেই ধ'রে শেষটা  
বল্ল রাজা, "তুমিই না হয় কর না ভাই চেষ্টা।"  
চন্দ্র বলেন, "মারতে চাও ত ডাকাও নাকো জল্লাদ,

গন্ধ শুকে মরুতে হবে এ আবার কি আহ্লাদ?"  
ছিল হাজির বৃদ্ধ নাজির বয়সটি তার নব্বই,  
ভাবল মনে, "ভয় কেন আর একদিন তো মরবই-"  
সাহস করে বললে বুড়ো, "মিথ্যে সবাই বকছিস,  
শুকতে পারি হুকুম পেলে এবং পেলে বক্শিস।"  
রাজা বলেন, "হাজার টাকা ইনাম পাবে সদ্য,"  
তাই না শুনে উৎসাহতে উঠল বুড়ো মদ।  
জামার পরে নাক ঠেকিয়ে- শুকল কত গন্ধ,  
রইল অটল, দেখল লোকে বিস্ময়ে বাক্ বন্ধ।  
রাজ্য হল জয় জয়কার বাজল কাঁসর ঢঙ্কা,  
বাপ্রে কি তেজ বুড়োর হাড়ে, পায় না সে যে অন্ধা!

### গল্প বলা

"এক যে রাজা-", "থাম্ না দাদা,  
রাজা নয় সে, রাজ পেয়াদা।"  
"তার যে মাতুল-", "মাতুল কি সে?  
সবাই জানে সে তার পিসে।"  
"তার ছিল এক ছাগল ছানা-"  
"ছাগলের কি গজায় ডানা?"  
"একদিন তার ছাতের প'রে-"  
"ছাত কোথা হে টিনের ঘরে?"  
"বাগানের এক উড়ে মালী"-  
"মালি নয় ত? মেহের আলী-"  
"মনের সাথে গাইছে বেহাগ-"  
"বেহাগ তো নয়? বসন্ত রাগ।"  
"থোও না বাপু ঘ্যাঁচা খেঁচি-"  
"আচ্ছা বল চুপ করেছি।"  
"এমন সময় বিছানা ছেড়ে  
হঠাৎ মামা আসল তেড়ে,  
ধরল সে তার ঝুটির গোড়া-"  
"কোথায় ঝুটি ? টাক যে ভরা।"  
"হোক না টেকো, তোর তাতে কি?  
লক্ষ্মীছাড়া মুখ্য টেকি।  
ধরব ঠেসে টুটির প'রে,  
পিটব তোমার মুডু ধ'রে-

কথার উপর কেবল কথা,  
এখন বাপু পালাও কোথা?"

## নোট বই

এই দেখ পেনসিল্ নোটবুক এ হাতে,  
এই দেখ ভরা সব কিনবিল লেখাতে।  
ভালো কথা শুনি যেই চট্ পট্ লিখি তায়-  
ফড়িঙের ক'টা ঠ্যাং, আরগুলো কি কি খায়।  
আঙুলেতে আঠা দিলে কেন লাগে চট্চট্,  
কাতুকুতু দিলে গরু কেন করে ছট্ফট্।  
দেখে শিখে প'ড়ে শুনে ব'সে মাথা ঘামিয়ে  
নিজে নিজে আগাগোড়া লিখে গেছি আমি এ।  
কান করে কট্ কট্ ফোড়া করে টন্ টন্ -  
ওরে রামা ছুটে আয়, নিয়ে আয় লষ্ঠন।  
কাল থেকে মনে মোর লেগে আছে খট্কা  
ঝোলাগুড় কিসে দেয়? সাবান না পট্কা?  
এই বেলা প্রশ্নটা লিখে রাখি গুছিয়ে  
জবাবটা জেনে নেব মেজদাকে খুচিয়ে।  
পেট কেন কামড়ায় বল দেখি পার কে?  
বল দেখি বাঁজ কেন? জোয়ানের আরকে?  
তেজপাতে তেজ কেন? ঝাল কেন লঙ্কায়?  
নাক কেন ডাকে আর পিলে কেন চমকায়?  
কার নাম দুন্দুভি? কাকে বলে অরনি?  
বলবে কি, তোমরা ও নোটবই পড়নি।

## ভয় পেয়ো না

ভয় পেয়ো না, ভয় পেয়ো না, তোমায় আমি মারব না-  
সত্যি বলছি কুস্তি ক'রে তোমার সঙ্গে পারব না।  
মনটা আমার বড্ড নরম, হাড়ে আমার রাগটি নেই,  
তোমায় আমি চিবিয়ে খাব এমন আমার সাথি নেই!  
মাথায় আমার শিং দেখে ভাই ভয় পেয়েছ কতই না-  
জানো না মোর মাথার ব্যারাম, কাউকে আমি গুঁতোই না?  
এস এস গর্তে এস, বাস করে যাও চারটি দিন,  
আদর ক'রে শিকেয় তুলে রাখব তোমায় রাত্রি দিন।  
হাতে আমার মুগুর আছে তাই কি হেথায় থাকবে না?  
মুগুর আমার হাঙ্কা এমন মারলে তোমায় লাগবে না।  
অভয় দিচ্ছি শুনছ না যে? ধরব নাকি ঠ্যাং দুটা?  
বসলে তোমার মুন্ডু চেপে বুঝবে তখন কান্ডটা!  
আমি আছি গিন্নি আছেন, আছে আমার নয় ছেলে-  
সবাই মিলে কামড়ে দেব মিথ্যে অমন ভয় পেলে।

## পালোয়ান

খেলার ছলে ষষ্ঠি চরন হাতী লোফেন যখন তখন,  
দেহের ওজন উনিশটি মন, শক্ত যেন লোহার গঠন।  
একদিন এক গুন্ডা তাকে বাশ বাগিয়ে মারল বেগে-  
ভাঙল সে বাশ শোলার মত মট ক'রে তার কনুই লেগে।  
এইত সে দিন রাস্তা দিয়ে চলতে গিয়ে দৈব বশে,  
উপর থেকে প্রকান্ড ইট পড়ল তাহার মাথায় খ'সে।  
মুড়ুতে তার যেমনি ঠেকা অমনি সে ইট এক নিমিষে  
গুঁড়িয়ে হ'ল ধুলোর মত, ষষ্ঠি চলেন মুচকি হেসে।  
ষষ্ঠি যখন ধমক হাঁকে কাঁপতে থাকে দালান বাড়ী,  
ফুঁয়ের জোরে পথের মোড়ে উল্টে পড়ে গরুর গাড়ী।  
ধুমসো কাঠের তক্তা ছেঁড়ে মোচড় মেরে মুহূর্তেকে,  
একশো জালা জল ঢালে রোজ স্নানের সময় পুকুর থেকে।  
সকাল বেলার জল পানি তার তিনটি ধামা পেস্তা মেওয়া,  
সঙ্গেতে তার চৌদ্দ হাঁড়ি দৈ কি মালাই মুড়কি দেওয়া।  
দুপুর হ'লে খাবার আসে কাতার দিয়ে ডেকুচি ভ'রে,  
বরফ দেওয়া উনিশ কুঁজো সরবতে তার তৃষণ হ'রে।  
বিকাল বেলা খায়না কিছু গন্ডা দশেক মন্ডা ছাড়া,  
সন্ধ্যা হলে লাগায় তেড়ে দিস্তা দিস্তা লুচির তাড়া।  
রাত্রে সে তার হাত পা টেপায় দশটি চেলা মজুত থাকে,  
দুম্‌দুম্‌দুম্‌ সবাই মিলে মুণ্ডর দিয়ে পেটায় তাকে।  
বললে বেশি ভাববে শেষে এসব কথা ফেনিয়ে বলা-  
দেখবে যদি আপন চোখে যাওনা কেন বেনিয়াটোলা।

## আবোল তাবোল-২

মেঘ মুলুকে ঝাপসা রাতে,  
রামধনুকের আবছায়াতে,  
তাল বেতালে খেয়াল সুরে,  
তান ধরেছি কণ্ঠ পুরে।  
হেথায় নিষেধ নাইরে দাদা,  
নাইরে বাঁধন নাইরে বাধা।  
হেথায় রঙিন্ আকাশতলে  
স্বপন দোলা হাওয়ায় দোলে,  
সুরের নেশায় বরনা ছোটে,  
আকাশ কুসুম আপনি ফোটে,  
রঙিয়ে আকাশ, রঙিয়ে মন  
চমক জাগে ক্ষণে ক্ষণে।  
আজকে দাদা যাবার আগে  
বলব যা মোর চিঙে লাগে-  
নাই বা তাহার অর্থ হোক  
নাইবা বুঝুক বেবাক লোক।  
আপনাকে আজ আপন হতে  
ভাসিয়ে দিলাম খেয়াল স্রোতে।  
ছুটলে কথা থামায় কে?  
আজকে ঠেকায় আমায় কে?  
আজকে আমার মনের মাঝে  
ধাঁই ধপাধপ তব্বা বাজে-  
রাম-খটাখট ঘ্যাচাং ঘ্যাচ্  
কথায় কাটে কথায় প্যাচ্ ।  
আলোয় ঢাকা অন্ধকার,  
ঘন্টা বাজে গন্ধে তার।  
গোপন প্রাণে স্বপন দূত,  
মঞ্চে নাচেন পঞ্চ ভূত!  
হ্যাংলা হাতী চ্যাং দোলা,  
শূন্যে তাদের ঠ্যাং তোলা!  
মক্ষিরানী পক্ষীরাজ-  
দস্যি ছেলে লক্ষ্মী আজ!  
আদিম কালের চাঁদিম হিম

তোড়ায় বাঁধা ঘোড়ার ডিম।  
ঘনিষে এল ঘুমের যোর,  
গানের পালা সাজ মোর।